

Evento riba Freewinds tabata exitoso

"Go Cultura Foundation" contento cu sosten



ORANJESTAD (AAN): "Go Cultura Foundation" kier a gradici tur persona cu a haci e concierto di Diasabra ultimo riba Freewinds un éxito rotundo. E no tabata solamente e celebracion di e prome aniversario di e fundacion aki, pero tambe el a sirbi como oportunidad pa "Go Cultura Foundation" por recauda fondo, pa sigui brinda su sosten na esnan di e sector cultural y creativo riba nos isla.

A wordo demostra cu hunto nos no ta solamente creando mas artista, pero tambe "role-models" den nos comunidad. Personanan ehemplar cu lo inspira tur esnan cu nan impacta, pa nan tambe por aspira tur dia pa logra nan maximo potencial. E tabata un anochi excelente den cual talento hoben y autentico a resalta. Nos ta masha satisfecho cu e publico berdaderamente a disfruta di dos ora largo di un concierto grandioso.

Na tur persona y instancia cu a cumpra carchi di entrada, y cu tabata tey presente; boso presencia y aplauso ta significa un estimulo grandi pa tur e hobennan cu a presenta.

E impacto di proyectonan asina, cu lo sigui wordo presenta di un forma continuo, lo ta masha positivo riba nos comunidad den varios aspecto. Especialmente riba

esnan mas hoben y vulnerabel den nos sociedad.

Esaki siguramente no ta algo cu lo tin su efecto solamente pa un dia, sino pa añanan largo y logrando esey, mas y mas hoben lo por ta embaahadornan real di e isla aki. Nos ta consciente cu pa logra e meta di stimula un comunidad hopi mas creativo y participativo, no ta algo cu lo pasa di un dia pa otro. Pero un caminda nos mester cuminsa. E momento ta awor. Si nos cuminsa awor, dentro di poco nos isla lo ta mucho mas mihor y nos lo ta hopi mas orguyoso di nos mes hendenan.

Kier a gradici tur artista cu ta kere den nos causa y cu a participa den e concierto special aki.

Na Freewinds cu ta un aliado masha importante pa nos, y pa hopi otro organisacion mas, pa

por sigui recauda fondo pa inverti bek den nos comunidad. Freewinds ta un barco crucero cu tin 30 aña contribuyendo y yudando un cantidad grandi di instancianan local recauda fondo pa por sigui haci nan bon trabao.

Na prensa local cu a percura pa e noticia yega mas serca di tur esnan riba nos isla. Na e voluntarianan di nos fundacion, un danki inmenso pa tur e trabao incansabel.

"Go Cultura Foundation" ta comprometi pa no solamente ta un aliado real pa nos artista y creativos, pero tambe pa ta un influencia importante den e mision pa pone cultura y creatividad na e curason di e desaroyo sostenibel Arubano.

Pa keda semper na altura di nan proyectonan y eventonan, ta invita bo pa uni bo mes na nan pagina di Facebook.